

Boqonnaa Sadii

Fedhii Ummata keenyaa
guutuu kandanda'u sirna
tajaajila hawaasummaa haqa
qabeessaa ta'e diriirsuu

3

Galmoota badhaadhina hawaasummaa waggaa shanii Paartii keenyaa mirkanees-san;

- Sirna barnootaa qulqullinaafi dhaqqabummaa haqa qabeessaa gidduglees-sa godhate diriirsuu
- Sirna eegumsa fayyaa dhukkuba ittisuu irratti hundaa’ee fi yaalanii fayy-isuu bu’uura godhate diriirsuu
- Mirga dubartootaa, daa’immaniifi dargaggootaa, bakka bu’insaafi fayy-adamummaa misoomaa mirkaneessuu
- Sirna wabii hawaasummaa(social security) jabeessuu
- Misooma aadaa,tuurizimiifi ispoortii jabeessuu

Ka’umsi guddina dinagdeefi hawaasummaa biyya keenyaa sadarkaa gadi aanaa irratti waan argamuuf badhaadhina hawaasummaa hunda galees-saa ta’e mirkaneessuu dhimma ijoo toora xiyyeeffannoo dinagdee keenyaa ta’a. waan ta’eef hojilee misooma hawaasummaa dhimma galma guddinaafi fayyadamummaa haqa qabeessummaa milkeessuu ta’a. Hojileen misooma hawaasummaa sirna kennaa tolaafi wabii hawaasummaa keessa ture keessaa bahee rakkoo jiru karaa abbaa mirgummaan ilaala. Misoomni hawaasummaa humna dinagdee biyya keenyaan kan daanga’u ta’uyyuu, akka adeemsaatti garuu dhimmicha akka kennaatti ilaaluurra akka mirgaatti fudhachuun karaa dinagdee biyyattii tilmaama keessa galcheen deebii kan argatu ta’a.

Paartiin keenya badhaadhina hawaasummaa hunda galeessa ummattoota biyya keenyaa mirkaneessuufi waggootan dhufan keessatti Itoophiyaan biyya badhaadhina hundagaleessa ta’e milkeessuudhaan Afrikaa keessatti fakeenya akka taatu kan hojjetu yoo ta’u tajaajila hawaasummaa qulqullina qabu dhaqqabamaa taasisuun mirgoota kutaalee hawaasaa adda addaa kabachiisuufi hirmaannaasaa-nii guddisuun akkasumas kutaalee hawaasaa rakkoo saaxilamoo ta’an jireenya gadadoo keessaa kan isaan baasu sirna wabii hawaasummaa hojiirra oolchuun badhaadhinaa hawaasaa mirkaneessuuf ni hojjeta.

3.1 Sirna Barnootaa Qulqullinaafi dhaqqabum-maa haqa qabeessa giddu-gleessa godhate diriirsuu

1.

Qulullina barnootaafi sirrummaa isaa sadarkaa hundatti fooyyeessuun sirna barnootaa daa'immaaniifi dar-gaggoota humnasaanii fayyadamuu isaan dandeessisu ni diriirsina. Malli barsiisummaa sirna barnoota biyya keenyaa, meeshaaleen barataafi barsiisaa akkasumas sirni gamaggamaa akka fooyya'uufi fedhii gabaa jiru waliin akka walsimu taasisuun barat-tootni biyya keenyaa hundi baratoota biyyoota sirna barnootaa raawwii olaanaa qaban waliin kan madaalu sirna barnootaa qabxii olaanaa gal-meesisuu isaan dandeessisu akka jiraatu ni taasifama.

2.

Sadarkaalee barnootaa hundatti baadiyyaatti magaalatti, koorni-yaan, bu'uura haawasummaafi dinagdeen, qaama miidhamum-maa, carraas ta'ee carraaqqii irratti hundaa'uun loogii osoo hin uumami-in lammileen hundi barnoota akka argatan dhaqqabummaa barnoota haqa-qabeessaarratti xiyyeeffannoon hojjenna.

3.

Si'aa'inaafi bu'a qabeessummaa

fooyyeessuun sirna barnootaa itti gaafatamummaa, iftoominaafi miira abbummaa uumuu ijaaruuf ni hojjetama.

Kanaanis sirna geggeessaafi bulchinsa barnootaa jabeessuufi humnasaa cimsuun gahumsii fi bu'aa qabeessummaan akka fooyya'uuf hojijama-ta itti gaafatamumma, iftoomaafi abbummaa mirkaneessu diriirsuun sirna barnootichaan bulchiinsi gaari-in akka mirkanaa'u ni taasifama.

4.

Sirna barnootaa tokkummaa biyyoo-lessaa jabeessuufi barnoota naamusaafi amala gaarii sirna barnootaa sadarkaa tokkoffaa keessatti akka hammatamu taasisuun akkasumas tajaajila tola-ooltummaa barattoonni hawaasaaf kennan akka guddatu taasisuun walitti dhufeenyi dhaabbilee barnootaafi hawaasa gidduu jiru akka cimu, lammilee duudhaalee gaariin dhaangi'aman sirna barnoot-aa humna namaa gahumsaafi naatoo anoomaa hundagaleessaa ta'e hora-chuu nu dandeessisu akka qabannu ni taasifama.

5. Galteewwaan barnootaa damee dhuunfaa oomishuu akkasu-mas damee leenjiifi barnootaarratti hirmaannaa si'aa'ina qabu akka taasisu jajjabeessuufi sirna barnootaafi leenjii qabeenyaan deeggaramuu akka danda'u baankiin misooma

barnootaa akka hundeeffamu taasisuun karaa damee barnootaa tumsi mootumma, dhaabbilee miti-mootummaafi qooda fudhattootni dhuunfaa akka cimu ni hojjenna.

6.

Fooyya'insa qulqullina barnootaaf ramaddiin barsiisotaa sadarkaa hundumaar-ratti taasifamu murteessaa waan ta'eef barsiisonni dandeettii fooyyeefi naamusa gaarii akka qabaataniif xiyyeeffannoo addaa kenninee hojjenna. Ogummaan barsiisummaa akabajan isaa malu argatee dhaaloota akka qaruu ni taasifna. Kaffaltiin ogummaafi faayidaan barsiisota sadarkaa sadarkaan jiranii akka fooyya'u xiyyeeffannoo addaan ni hojjeta.

7.

Dhaqqabummaa barnoota olaanaa babal'isuufi haqa qabeessummaa mirkaneessuun barattootaafi leenjitoota gidduutti loogii tokko malee carraa damee barnootaa ofii filatanii galan bal'isuuf ni hojjenna. Dhaabbilee barnootaa olaanoofi filannoon dhiyeessii barnootaa teekinoolojiin deeggarama dhaqqabummaan barnootaa fedhiifi dandeettiin irratti hundaa'e akka jabaatu ni taasifama.

8.

Hojimaata industiriifi manneen hojii walitti hidhamsiinsa dhaabbilee barnoota olaanoo waliin jabeessu diriirsuun barattoonni barnoota gocha qabatamaan deeggarama akka argataniifi guddina ogummaa fedhii induustirii waliin walsimate

taasisuun qaxarriin eebbifamtoota dhaabbilee olaanoo akka guddatuuf ni hojjenna.

9.

Guddinaafi cehumsa teknooolojii aadaa saayinsii ijaaruu dandeessisan, beekumsa biyya keessaa maddanii tajaajila hawaasaafi rakkoo furuu danda'an, sirnoonni kalaqa, cehumsa beekumsa saayinsii babal'isuu dandeessisan ni diriiru. Fayyadamummaa teekinoolojii cimsuuf bu'uuraalee misooma ICT dirirsuu kalaqa teekinoolojiifi ce'umsaa geggeessuu teekinoolojii guddisu-ufi misoomsuun (artificial intelligence) dhimma xiyyeeffannoon irratti hojjennuudha.

10.

Dhaabbilee Barnoota ogummaafi leenjii teekinikaa madda ogeessota giddugaleessaafi bakka ogeessoonni gahumsa qaban leenjii gocha qabatamaa irratti hundaa'e leenji'anii bahan akka ta'an, dhaqqabummaan olitti qulqulinaaf xiyyeeffannoo kennanii akka hojjetaniifi bakka dargaggoonni teekinoolojiifi kalaqawwan rakkoo furuu danda'an keessaa horataman akka ta'aniif ni hojjetama.

3.2 Sirna eegumsa fayyaa dhukkuba ittisuufi yaalanii fayyisuu bu'uura godhate diriirsuu

1.

Hojii uwwisa tajaajila fayyaa hunda hammataa diriirsuufi dhaabbilee fayyaa

dhaqqabamaa taasisuuf paartiin keenya ni hojjeta. Keessatti rakkoowwan dhaqqa-abamummaa naannoowwan horsiisee bulaatti mul'atan furuuf paartiin keenya xiyyeeffannoo addaa kennuun kan hoj-jetu ta'a.

2.

Sirna faayinaansii fayyaa jabeessuun maatiiwwaan sirna inshuraanii fayyaa hawaasaa keessatti hammatamaniifi hoj-jetoota keenya sirna inshuraansii fayyaa hawaasaa keessatti hammataman haala olaanaa ta'een guddisuuf xiyyeeffannoon ni hojjenna.

3.

Sirna ittisa weerara dhibee qopheessuufi hojimaata wereera dhibee daddarboo karaa waaraa ta'een ittisuu nu dandees-sisu diriirsuu, sirna tajaajila fayyaa ha-waasaa dandeettii balaa tasaafi weerara dhibee dandamachuu danda'uufi bulchi-insa sodaa balaa cimaa ijaaruu xiyyeef-fannoon ni hojjetama.

4.

Tajaajila fayyaa haadholiif kennamu qul-qullinaafi qaqqabamummaasaa fooyyees-suun fayyadamtoot tajaajila qusannoo karoora maatii guddisuun du'aatii haad-holiifi daa'immanii sadarkaa olaanaan hir'isuuf xiyyeeffannoo addaan ni hoj-jetama. Quucarummaa daa'imman wag-gaa shanii gadi jiraniifi dhukkuba han-qina dhiigaa dubartoota umrii da'umsaa keessatti argaman mudatan akka xiqqaatu ni taasifama. Lammileen umrii dheeraa

akka jiraatan ni hojjeta.

5.

Magaalaattis ta'ee baadiyyaatti eegumsi qulqullina dhuunfaafi naannoo akka gud-datu, itti fayyadamn mana qulqullinaa (mana fincaanii) fooyyeessuuf xiyyeef-fannoo addaan ni hojjetama. Uwwisa tajaajila bu'uuraa manneen qulqullinaa tokkoon tokkoon maatii guddisuuf paar-tiin keenya ni hojjeta.

6.

Du'aatii sababa dhukkuboota daddarboon qaqqabu ittisuufi xiqqeessuuf qoran-noo H.I.V guddisuu, namoota haaraa dhukkuba HIVn qabaman xiqqeessuufi tatamsa'ina vaayirasichi haadharraa gara ilmootti darbuufi hanga du'aatii xiqqees-suu akkasumas ummata tajaajila qoricha farra HIV/AIDS argachuu qaban guddis-uuf ni hojjenna. Dabalataan tatamsa'ina dhukkuba sombaa(TB), dhukkuba qur-ciifi busaa xiqqeessuuf ni hojjeta. Wag-goottan shanan dhufan keessatti du'aatii sababa dhibee busaan qaqqabu guutuu-maa guutuutti dhabamsiisuuf xiyyeeffan-noo addaan ni hojjenna.

7.

Dhukkubbiiifi du'aatii sababa dhukku-bootaa daddarboo hin taaneen dhaqqa-ban ittisuuf sosochiin qaamaa gahaa ta'e akka babal'atuufi aadeffamu taasisuu, namoonni baala sammuu namaa hadoo-chuu fayyadaman akka xiqqaatan taas-isuu, dhiibbaa dhiigaa namoota umriin isaanii ganna 15 ol ta'e mudatu xiqqees-

suuf, dhaqabamummaa tajaajila kaas-ansarii fiixee gadameessaa karaa adda ta'een guddisuu akkasumas du'a umrii malee sababa dhukkuboota daddarboo hin taanee uumaman hammaan xiqqees-suuf paartiin xiyyeeffannoon ni hojjeta.

8.

Dhaqqamummaa qulqullina gidduga-leessa godhate diriirsuun, misoomaafi bulchiinsa humna namaa fooyyeessuun lakkoofsi ogeessa fayyaafi hakiimaa akka dabaluu taasisuun hojii seektara fayyaa milkeessuuf ni hojjetama.

9.

Seektara dhuunfaa damee yaala fayyaa irratti bobba'an keessumaa iyyuu abbootii qabeenyaa yaala fayyaa tuurizimii ispeeshaaliitii irratti akka hojjetan deegarsa addaa kan taasifamuuf yoo ta'u ogeeyyootni dhalootaan Itoophiyaa ta'an biyyi keenyaa yaalii tuurizimii fayyaan bu'a-qabeetti akka taatuuf damee kanarratti akka hirmaatan deegarsa ni taasisfamaaf.

3.3 Mirga dubartootaa, daa'immaniifi dargaggootaa, bakka bu'insaafi fayyadamummaa misoomaa mirkaneessuu

1.

Dubartoota gahoomsuufi qajeeltoo walximmaa koorniyaan mirga carraa walqixa argachuu isaanii miidhaafi aggaammii loogii hunda irraa ittisuun damee hunda

keessatti hirmaannaafi fayyadamummaa isaanii mirkaneessuun kaayyeeffannee ni hojjenna.

2.

Sirna eegumsa daa'immaniifi dubar-tootaa jabeessuun nageenyummaa hunda-galeessaa eegsisuufi mirgasaanii kabachiisuuf xiyyeeffannoo guutuun kan hojjetu ta'a. Barmaatilee boodatti hafoo miid-haa daa'immaniifi dubartootarra gahan akka xiqqaataniifi dhabamsiifaman sirni odeeffannoo namoota miidhaa kana qaqqabsiisan itti sassaabamu ni diriirfama. Miidhaa koorniyaa bu'uureffate raawwatamu ittisuuf ejjennoo mootummaa dhimma kanarratti obsa akka hin qabne agarsiisuu (zero tolerance) hojiitti hii-kuun daa'immaniifi dubartoota miidhaan kun irra gahe haala addaan yaala akka argatan, miidhaa dubartootaafi daa'iman irratti raawwatamu qolachuuf ammoo humna poolisii miidhaa aggamamu qo-lachuu danda'u akka hundaa'u ni taasi-fama. Daa'imman haala rakkisaa keessa jiraatan deeggaruuf Ejensiin tajaajila hawaasummaa daa'immanii sirna mana-jimantii keezii irratti hundaa'e hojjiirra ni oolfama.

3.

Dhaqna qabaa shamarraniifi heeruma umrii malee hambisuuf sochiin hunda hirmaachise sadarkaa sadarkaan adeemsisuufi sagantaalee barnootaa huban-noo hawaasaa gabbisan karaa miidi-yaa hawaasa dhaqqabsiisuun dhaqna

qabaa shamarraniifi heerumni umrii malee sadarkaa olaanaan akka hir'atu ni taasisna.

4.

Filannoowwan addaa addaa biyya keessa jiran adda baasuufi babal'isuun humna daa'imman rakkoo keessa jiran deegga-ruu dandeessisu sirna tajaajila hawaasum-maa daa'immanii diriirsuun daa'imman deeggarsi taasifamuufi qabu deeggarsa akka argatan ni taasifama. Dubartooni-ifi daa'imman miidhaan irra gahe bakka aaragalfii fi tajaajila hundagaleessa food-daa tokkoon kennamu akka argatan, wald-haansa xiinsammuufi hawaasummaa, tajaajila seeraa akka argatan, dinagdeen akka of danda'aniifi maatiittii deebi'anii akka makaman ciminaan ni hojjetama. Bakki oolmaa daa'immanii dhaabbilee mootummaa, damee dhuunfaafi sadarkaa hawaasaatti akka babal'atuufi jabaatu ni hojjetama.

5.

Dargaggoota gahoomsuufi hirmaachis-uun walqabatee hojilee ijaarsa dandeetti dargaggootaa giddugaleessa godhate hoji-irra oolchuun dargaggonni humnaafi dandeettisaanii baasanii akka fayyadaman, hirmaannaa gama hundaan taasisan kees-satti dorgomtoota cimoofi fayyadamoo akka ta'an xiyyeeffannoon ni hojjetama. Hirmaannaa dubartoonniifi dargaggonni geggeessummaafi murtoo seera baastuufi raawwachiistuu kennuu keessatti qaban haqa qabeessaafi bakka bu'ummaa isaa-

nii akka dabalu taasisuuf paartiin keenya xiyyeeffannoon ni hojjeta. Kuwaansiliin dargaggootaa sadarkaa guutuu biyyaatti akka hundeeffamu haala mijeessuun dargaggoonni bakka bu'ummaa akka qabaatan Paartiin Badhaadhinaa ni hojjeta. Giddugala walitti dhufeenya odeeffannoo dargaggootaa (Youth Connect Program) hojiirra oolchuun dargaggoota Afrikaafi idil-addunyaa hariiroo walitti dhufeenyaa akka tolfatan haalli ni mijaawa. Giddugallii dargaggoota araada irraa dandamachiisu akka babal'atu ni taasifama.

6.

Fandii misoomaa hundeessuun dubar-toota hojii uuman kallattiinis ta'ee al kal-lattiin fayyadamtoota fandii kanaa akka ta'aniif fayyadamummaa dinagdee haqa qabeessaa mirkaneessuufi hojiin qindees-summaa kan hojjetamu yoo ta'u, dubar-tootni liqiin, waldaalee hojii gamtaan, abbaa qabeenyummaa lafa baadiyyaan fayyadamoo akka ta'aniif paartiin keenya xiyyeeffannoo addaan ni hojjeta. Dhaabbilee teknoolojii kalaqan waliin hariiroofi qindoomina uumuun dubartoonni teknooloojiiwwan yeroofi humna qusatanitti akka fayyadaman ni hojjenna.

7.

Hojimaata sirna liqii dargaggootaaf mijataa ta'e diriirsuun lammilee tajaa-jila liqii argatan keessaa gaheen dargaggootaa olaanaa akka ta'u ni hojjetama. Carraawwan hojii karaa Intarpiraayizoota Maaykiroofi Xixiqqaa uumam keessatti

dargaggoonni fayyadamuu akka ta'an sagantaan ni diriirfama

3.4 Sirna Nageenya Wabii hawaasummaa Jabeessuu

1.

Walitti dhufeenya industirii fayyaa-lessa ta'e uumuufi karaa waaraa ta'een fooyyeessuuf mirga gurmaayuu hojjettaafi hojjechiisaa guddisuuf ni hojjeta. Sadarkaa jaarimiyaatt walitti dhufeenya gam-lamee hojii cimsuufi marii hawaasummaa gabbisuufi boordii dhimma hojjetaafi hojjechiisaa irratti gorsa kennu naannoleefi magaalota hunda keessatti akka dhaabbatu taasisuun dhimmoonni falmisiisoo karaa hojjetaafi hojjechiisaa dhiyatan waliigalteen akka furamaniif ni hojjenna. Humna daa'immanii seer-aan ala fayyadamuu ittisuuf saganta-aleefi hojimaata addaa addaa diriirsuun humna daa'immannii karaa seeraan alaa akka hin sarbamne ni hojjetama. Tajaajila fayyummaafi nageenyummaa ogummaa jajjabeessuufi babal'isuuf eksiteenshinii eegumsa fayyummaa intarpiraayizoota xixxiqqaafi giddugaleessaa qaqqabam-aa gochuuf balaa hojiirratti uumamuu danda'aniifi dhukkuba ogummaan walqa-batee dhufu karaa waaraa ta'een ittisuufi balaa namaafi dinagdee irra gahuu malu hir'isuuf ni hojjenna.

2.

Bobbiin hojii si'aayaafi haqa qabeessa sadarkaa olaanaan akka babal'atu ni taasifama. Hojii dhabdummaa xiqqeessuuf

lakkoofsa lammilee deeggarsa bobbii ho-jii argatanii n bobba'anii akka guddatu taasisuuf ni hojjenna. Uwwisaa wabii hawaasummaa guddisuuf hojjettoonni dhaabbilee dhuunfaa fandii soormaa akka galmaa'ani ni taasifama. Fandii sooramaa irraa argamu investimantiirra oolchuun bu'aan irraa argamu guddisuuf xiyyeef-fannoon kan hojjetu ta'a. Sirna wabii hawaasummaa diriirsuufi tajaajilisaa babal'isuun fayyadamummaa dinagdeefi hawaasummaa lammilee guddisuuf ni hojjetama. Sagantaa wabii hawaasummaa kana bifa amansiisaafi bu'aa qabeessa ta'een hojiitti hiikuuf waajjiraalee fandii wabii hawaasummaa hundeessuun fayyadamummaa haqa qabeessaa mirkaneessuuf ni hojjetama. Qaama miidhamtoota hiyyeessaafi saaxilamoo, manguddoota akkasumas kutaalee hawaasaa oolmaafi bulmaanniisaanii dirreerra ta'e fayyadamtoota misooma seeftineetii akka ta'an ni hojjenna.

3.5. Misooma Aadaa, Tuurizimiifi Ispoortii Mirkaneessuu

1.

Qabeenyaa uumamaafi aadaa keenya eeguufi misoomsuuf xiyyeeffannoo addaa kan kenninu ta'a. Pirojeektota qabeenya amma qabnu mancaatiirraa eeganii kunuunsuun dhaloota egereetti dabarsuu dandeessisan hojiirra oolchuun qabeenya uumamaafi aadaa keenya gaddina biyyaafi misooma hawaasummaaf akka oolan taasisuuf ni hojjenna. Kanaan walqabatee tarsiimoo misoomaa aadaa, tarsiimoo misooma afaanii, tarsiimoo

misoomaa og-barruu gara hojii qabata-
maattii akka jijjiiramaniif ni hojjenna.

2.

Biyyii keenya qabeenya uumamaafi dilbii aadaa qabdu fayyadamtee galii tuurizimii irraa argachuu maltu argachuu dhabuufi biyyoota sadakaa biyya keenyaarra jiran waliin yoo madaalamtu sadarkaa gadi aanaa irratti argamuun ishee haalan nama gaabbisiisa. Waggootan dhufan keessatti seektara turiizimii karaa qabeenya qabnu gituu danda'uun hojimaata misooma tuurizimii sadarkaa idil-addunyaatti dorgomaa taasisu ni bocama. Bakka tuuriistoonni qubatan misoomsuu, qorannoo qabaafi piroomooshinii taasisuufi hojiiwwan baay'inaafi qulqullina tajaajilaa irratti xiyyeeffatan hojiiirraa akka oolan ni taasifama. Seerota, imaammattoota, hojimaata, gurmaa'insa, galteewwan teknoolojii damee tuuriizimii jajjabees-san qopheessuun hojiiirra akka oolan ni ta'a. Imaammata eegumsa misooma hambaalee, tarsiimoo eegumsa nageenya turizimii, tarsiimoofi bulchiinsa misooma bu'uuraalee turizimii, tarsiimoo piroomooshinii gabaa, tamsaasa odeeffanno turiistotaafi hirmaannaafi fayyadamummaa hawaasaa naannoo hawwaata tuuri-istii jiraatanii karaa guutuu ta'een akka jijjiiramu ni taasifama.

3.

Karaa damee ispoortiin biyyi keenya It-oophiyaan humna kuufamaa guddaa kan qabduufi madda ispoorteessitoota addunyaa ajaa'ibsiisaniiti. Haa ta'u malee, biyyi keenya qabeenya karaa damee kanaan qabdu duguuganii hojiiirraa oolchuu humni dandeessisu dhabamuu irraa kan ka'e humna oomisha oomishee sona dabaluu danda'u horachuu irratti qaawwi akka jiru hubatameera. Kana bu'uura godhachuudhaan hojiimata lammilee keenya bal'inaan isooprtii irratti akka hirmaatan taasisan hojiiirra akka oolan gochuun lammii si'oominaafi fayyaa qabu horaachuuf ni hojjenna. Imaammata farra qoricha humna dabalataa ispoortessitootaaf kennu hojiiirra oolchuun hawaasa ispoortii qoricha humna dabaltaa namaa kennu irraa bilisa ta'e uumuuf ni hojjenna.

4.

Bu'aa industiriin kalaqa artiifi bashannanaa biyya keenyaaf qabu hubachuudhaan madda carraa hojii akkasumas biyyaaf galii akka argamsiisu keessumaa ammoo guddina teekinooolojii waliin walqabatee fedhii gara fuulduraatti uumamu tilmaama keessa galchuun dameen kun karaa hojiiwwan oodiyoo-viziwaalii, taatoo waltajjii ogbarruu dorgomaa akka ta'u mala dhahuudhaan akkasumas imaammata taatoo waltajjii guddisan hojiitti hiikuun industirii kalaqa hojii gabbisuun kan hojjennu ta'a.



**Paartii
Badhaadhinaa**